

四庫全書

集部

欽定四庫全書

文簡集卷四十九

明 孫承恩 撰

神道碑

中憲大夫都察院左僉都御史黃岩劉公神道
碑

嘉靖癸卯正月二日中丞山西黃岩劉公卒於家閱四
年其子鄉進士承裕走都下持其同鄉宮贊閭君幼泉

所具狀授承恩俾為文刻於隧首之石憶昔辛未歲承恩忝隨公舉進士同選翰林院庶吉士讀中秘書見公終日恂恂然若無所為而不知中實自勵每閱試院課公未嘗不與多為諸老稱許因知公用心之專且勤異時將以文翰名也既而解散職業殊途承恩且卧疴山中久之乃不知公後所樹立今觀狀所具則公之履歷具在其才識器度豈特用意文翰者而已哉公於癸酉歲初授兵科給事中值今上即位一新庶政有詔起用

太監蕭敬公以初政係天下觀望而先向用宦寺恐失天下心時同列皆知不可而莫敢言公抗疏諫止言甚剴切疏留中數日不出人為公危公曰吾知盡吾職耳若計利害當不言矣上亦悉公忠惻竟優容之民有田為勢豪所奪詔所司按之勢豪執券為據牢不可屈公以風力近臣繼被命往按其故籍破偽券田歸之民衆稱快洎例改翰林院檢討與脩武廟實錄銳意欲復古史法曰作史者美惡必並書若侈美而諱惡則何以示

勸戒毅然以直筆自任衆論有同異必辯析求是無阿徇焉事竣竟得外補仍左遷大明府判每詞臣謫外輒養望自重公獨俛首就職業不以為屈翻閱按牘稽鈎奸弊若老於吏治者長官政務有疑多於公取決闕元城書院聚生徒肄業而躬自訓迪乃科目日滋盛逾年陞南京宗人府經歷轉南京戶部郎中盡心於職長卿多賴其助庚寅陞江西按察司副使改督學河南作人之功居多尋陞貴州布政司右叅政未上調陝西甲午

陞山東按察使甫視篆閱所部囚寃狀者數百人曰殺人
人不以罪國法天道何在悉縱釋之逾年擢都察院左
僉都御史奉敕巡撫保定保定畿輔重地值歲屢歉貧
民多趨為盜物意洶洶公竭力撫綏鎮之以靜潛消其
變畿輔以安歲蝗勢甚盛公曰是惡可坐待其延蔓姚
宗事可按也移檄督捕甚嚴乃蝗不為灾紫荆等三關
密邇塞上為邊方要地公躬親巡歷練卒選將相度要
害分屯防守三年邊塵偃息居民安堵朝廷無西顧憂

東南輸賦以漕河淺澁病事聞詔命疏治公按圖計地督衆分役未幾以次訖工璽書褒賚有白金文綺之賜北嶽廟頽壞復奉詔葺治稱旨錫與有加于時內外多公勞勩謂當徵呂在即隱然公輔之望而公以倦仕懇乞休致歸歸之日軍民擁道泣送此公之才施於政事者如此要其雅志直以功業自許故所至輒有成績既家居猶為守令咨益而民陰受其惠其在諫垣以清正為衆所推累疏時政得失動輒千言觸忌諱不顧所謂

用世之才公奚媿也而承恩曩時所以期公者豈不淺哉然公之著述亦自有不可泯者有黃岩奏議七卷他文皆平正暢達詩多和婉可誦集隨地命名凡四種並藏於家公諱夔字舜弼別號黃岩世為襄垣人曾大父端領鄉薦署密雲教諭大父潔鄉薦監察御史終副使父鳳儀舉進士歷刑部員外郎俱以黃岩公貴贈南京吏部尚書母張氏封宜人公生于成化丙午九月二十三日距卒得壽五十有七配秦氏封恭人陝西副使昂

女前卒子男三長即承裕娶山東副使孟居仁女次承
華娶唐府儀賓宋宿女次承祥聘陝西叅議李延康女
承裕年十七舉鄉試亞元博學能文能世其業者也女
二長聘王氏早夭次適潞州衛指揮柴承爵承裕將以
今年月日墓公於韓山之原朝廷命有司諭祭四品秩
謝政且久恤典例艱得上軫念舊勞故越例賜云誠異
數也承恩無似曩辱公交契之末憶壬午之歲承乏奉
使安南公治具枉餞握手相視眷眷不忍釋爾後萍梗

參差無緣會晤詎意斯時遂成永訣乃今執筆為公身後之役顧鄙拙之文豈足彰公盛美特以承裕固請又重念平生乃為叙次其大至於孝友嫺睦特公庸行耳不備錄也系之銘曰

冀古帝都河山固塞鍾靈標奇才傑間出猗歟劉公重大直方生於世閥揚休襲芳給諫詞垣侃侃正色疏有讜論史有直筆勞弗言功仕不計宦隨在殫力惟義所安贊府地曹留都滯迹益厚其才益老其識乃董學政

文教克宣乃掌臬憲民無隱寃帝惟公賢俾奠畿服鎮
靜以治遠邇寧肅乃控三關鞠旅治戎桴鼓不驚金湯
崇崇漕河阻艱公治底績獄祠告圯公董繕飭帝曰嗟
哉予嘉汝勞文綺白金載錫載褒柄用且及公則厭仕
疏乞歸來止足之義老不忘世退不忘君邦使大夫問
政在門仕多顯庸處有令譽貽後藏家亦富有製天弗
憖遺溘焉殂終才弗既用士林之恫公之衆善未易殫
紀茲惟其大亦足表世韓山之原有丘窿然樹碑勒銘

來者考觀

墓表

鶴坡王先生墓表

嘉靖十三年八月十二日鶴坡王先生卒有傳先生死
事者云先生疾革恍惚夢大星煜然光芒燭身頃墮地
驚寤肅容端坐而逝宮窠氏孫子曰異哉吾聞賢哲之
生上應列宿彼煜然者殆先生耶越明年其子陶將治
塋事則持嘉禾沈君概所為狀過孫子告曰吾先子之

塋其墓首之石當有文子於我為姻婭又先子厚雅子
盍表諸蓋予與陶同婿貳守一齋公門而辱先生愛最
久乃為表曰先生諱良佐字良弼別號鶴坡世居華亭
之涿涇曾祖某祖某父某俱不仕母某氏先生自幼穎
敏七歲通詩書大義十三能文章入黌校聲稱籍甚僉
謂元魁可拾取也逾五十始薦於鄉屢上春官弗利久
之補署靖海學諭規範之下士無跛行邑素乏科目既
經先生指授遂有中甲科者二流賊刼掠郡邑多殺戮

人守令往往鼠竄至是傳聞將入境有勸先生宜少避者先生曰吾何走賊即至吾固將抱祭器罵賊以死何避也甯中丞杲督官軍討賊先生陳五事大見器賞尋陞湖廣廣濟縣令有僧終日坐不食遠近尊事之施遺至合先生至則使人庶得其實無異其二侍童則女子也收之置於法籍其財於官一邑人皆驚邑小而民貧先生極意撫循民稍有生色逆寧構禍軍興征需百出邑弗能供上官督譴嚴迫先生嘆曰財非天降地出使

吾日鞭笞吾民盡糜爛之亦何益也吾何忍哉稱疾棄官歸自是養高丘園者二十年耆德雅望為鄉閭重郡大夫過先生之門必就而請益焉壽至九十乃終此先生出處始終大致如此先生天性甚孝早喪父極哀毀以母老兩值會試不行恬淡寡欲接人以誠篤意雅素在廣濟日沈雲巢淮弟客死近境為棺衾之戚龍淵韶死而貧撫其孤如己子長則倡義裒財為之娶媼既受命坎軻抱才弗遇乃從好古文辭益以撰述自娛淘洗

刮磨脫去近俗詩精鍊超拔與后山簡齋相上下至於
大篇豪宕單辭峻絕則二子所無文亦雅健可誦有鶴
坡稿二十冊藏於家配焦氏繼周氏皆無出再娶周氏
生一子即陶先娶吳氏即一齋公女再娶褚氏女一適
御史周適齋弟鸞孫男四懋德懋功習舉業懋文懋武
尚幼塋以十四年某月某日墳在秀州洪之原銘曰
弗耀弗昌有潛其光魄焉斯藏其神上行奎壁之旁厥
星吐芒孰謂先生亡耶

潮州府知府適齋周君墓表

嗚呼士有負才智足以建立事功而不獲竟其用者非人也天實為之嗚呼士有持風裁足以權衡人物而不獲永令名者非天也人固厄之才不易得也天既以有為之才畀斯人若將有意然而不遂畀之以遠者大者俾足以自樹而卒以淹沮而遂已則所以為之者吾不於天而誰尤事常安於昧昧持論之士多刻覈論事務極底裡人至不能堪而與為敵用是以致摧衄者人厄

之也非天也嗚呼若吾友適齋周子殆類是歟周子諱
鶴字文儀適齋其號性敏而達凡事多所究識如此而
始如此而終如此而成如此而敗可指諸掌也其才惟
是故其推測事理往往出人意表甚至使人無以措手
嗚呼茲其所謂不能堪者乎周子初舉進士授御史奉
命印馬前是無印至周子則具疏請主者以無例卻周
子曰事當問應否何必例也卒得請去繼按閩省時省
臣有失控御激軍衛作亂者衆大譁矜愕相顧城門晝

閉變且叵測周子聞則疾出曉諭開以禍福戮其渠魁
衆皆帖服解散巨璫羅籥以鎮守橫甚周子屢奏劾之
竟謫戍去振作文教脩武夷書院置田以贍生徒歲賔
興監臨剗革積弊是科得人為盛毅皇帝南巡懇疏諫
止弗報寧藩之變檄有司峙軍餉為緩急備憲度肅如
也泊遷守潮潮有巨姓蕭甲挾富稔惡先時每坐即以
賄脫周子廉得之卒置於法潮人懽呼周子之才少出
毫末前後以卓異見如此若其辨察太明志意太銳其

按治也百司救過不暇凡所舉馭老吏無以自解刷京
畿諸曹文卷弗少假借若相臨然於時舊制廢久矣行
僅周子孰能堪之無何而出守無何歸矣然則周子之
不能大有所就者不其然哉才智之士挾其能務為卓
絕以自異近於所謂求全之毀者否則周子年踰強仕
始獲第拜官而復不自慎重以致顛蹶吾知周子必不
爾也周子世家華亭曾祖慶餘祖勗考祐號桂軒以子
貴贈如其官妣盛氏贈孺人周子峭直少容常面折人

過至人有善亦樂道之賑窮乏撫育遺孤獎與後進辭
翰亦清麗可喜既歸方督課諸子學業振刷門戶未幾
以疾卒周子生成化壬辰正月十八日卒嘉靖丁亥八
月二十九日壽五十有六配劉氏宋忠肅公之裔侯門
教讀南村翁之女子四憑慈國子生志邑弟子員思習
舉業女三長適金山衛指揮孫寵次適平湖國子生陸
勲次受嘉定沈稱聘孫男三孫女五周子卒之明年其
諸孤將以十一月十日塋於城南鳳凰莊之新兆來謁

余文表其上余雅與周子厚不得辭也故以居常所以
論周子者序列俾刻之復為銘曰騏驥千里孰掣紲之
噫皎皎白圭孰缺折之噫天乎天乎杳莫誌之噫隧首
有文銘以恒之噫

處士石厓周翁墓表

大江之西有石厓周處士者即卒之十年其子來官華
亭始出其所次世系行實授宮窠氏毅齋孫子為文以
表其墓上其世系曰周氏為永豐世族自宋元來代有

聞人曾祖諱晨以孝廉終養祖諱祖澤由鄉進士為海陽令有儒吏風歿而從祀鄉賢考諱延慶號曾菴以行誼著尹文穆公為立傳妣某氏處士諱勗字勉之號石厓曾菴季子也其行實曰處士篤孝友事親色養備至曾菴卒在殯會有寇屠劫近地處士哀金以俟乞免日守柩側伏而號處二兄敦睦急難殫力拯援振飭先業無餘力凡塋兆亭祠頽廢者繕葺之立綽楔具列其先世築室曰終慕以識孝思賙恤宗黨貧病者衣食之死

者棺衾之圖譜系貽族人曰毋俾其久為路人也塚墓
世遠將湮者志以石曰無俾後人迷委于樵牧也每慮
文獻中微擇師教子為宗黨倡故周氏子弟知奮於學
多彬彬焉處士於義利甚辨塋樹多數百年物其高入
雲有巨賈欲市以千金憚處士不可乃先以三百金私
處士處士斥之去接人和而能恭然不可以非禮犯所
與多名士若張東白氏丁補齋氏皆世之所謂貴而賢
者與孚契焉雅尚風義嘗賻補齋喪於數千里外繕橋

梁以濟徒涉葺廢亭以憩行者人皆德之少嗜學博覽
強記而不樂舉子業獨喜作古詩歌以自適冲澹簡遠
脫去世俗綺靡之習侔儻喜遊嘗泛彭蠡登匡廬沂大
江絕淮泗覽金陵吳越之勝觀風於齊魯之墟襟懷浩
然居則偕良朋勝友陟降於山巔水涯觴詠以樂閱世
七十有九考終處士有疾弗御藥疾既革賦詩與仲兄
訣沐浴端坐而逝可謂曠達矣處士篇什甚富而多遺
逸晚而裒石厓集四冊俾子孫藏於家娶鄭氏廣州節

推贈御史民思女有賢行先處士十四年卒子男七价
儀信俊傑倬佳价即由貢職教事俊邑庠生女一適楊
炳孫男十有五夢生夢龍夢庚夢翼夢鼎夢奎夢暘夢
夔夢熊夢桂夢松夢興夢喜夢悅夢得亦庠生孫女十
有一曾孫男五女六處士生於正統癸亥九月十五卒
於正德辛巳六月十七日葬於陽塢山祖塋之隅毅齋
子曰嗚呼世家之後尠矣夫所貴乎承傳者非必達也
處士雖終韋布而纂述遺休飭治振起連合族屬為裕

後計讀書循理道其風致詞翰可傳而誦也承世德若處士亦庶幾哉所謂世家者苟盡爾豈至有衰替哉今周氏子孫烝烝其後將必大皆處士之慶也吾是以感而縷縷焉銘曰弗肆弗拘行已也舒舒弗墮弗踰繼述也劬劬無歉其初有遺其餘已矣斯人鶴怨猿吁

亞中大夫長蘆運使柳溪許公墓表

亞中大夫長蘆運使許公卒之明年其兄今太宰柱國少保兼太子太保松臯公以太僕寺寺丞杜君緯狀授

毅齋子承恩曰予弟葬有日弟惟一子治塋事不能出
子其為我據此文於石以表諸墓予既諾退則叙曰許
氏為靈寶著姓其世系甚遠唐宋及勝國代有顯者乃
今益盛先襄毅翁位冢宰階正治上卿太子太保卒贈
光祿大夫如今太宰階實生子八人皆賢而先戶部尚
書謚康敏公洎今太宰尤焯焯顯大公則襄毅第六子
也諱詞字廷章別號柳溪以襄毅恩授南京都督經歷
改中軍都督府經歷明年擢守貴州思南府以母憂未

任服闋補湖廣鄖陽府改四川保寧府尋擢令官未幾
以疾卒公少而雋敏孝友篤至襄毅公卒奉母太夫人
能色養承歡疾則躬侍湯藥衣不解帶事親兄如嚴師
欽欽佩服訓言無怠以故德器夙成既入仕益自樹立
才識恢裕宦轍所至動有成績其知鄖陽也值歲侵公
告糴旁郡賑給有法全活不可勝紀故有冤獄久不決
公辨出之保康為鄖陽屬邑先是邑有不軌者事涉於
學討逆後學遂廢久莫克舉公申上官奏白得旨則卜

地創構黌宮置弟子員悉如故六龍南狩檄務旁午供
億百出有司往往逃避公獨挺身任事總理周密構宜
城行宮二百楹不終日而事集顯陵之役徵鄖七邑燒
造磚埴里甲科斂紛然公力請當道聽市新開窰於承
天近地量發民夫給役費乃大省保寧往歲曾議封壽
王於其境府既構而輟居遺宇故存雖經奏毀廢而莫
敢任其責者風雨摧剝行道為嗟公率屬經理其事易
貲得鉅萬實公帑以餘材繕葺學舍洎諸廨宇即廢址

列市肆區畫井井六十年榛莽之地倏為一都會蜀人
歌美之公既以才敏達於政名日益起撫按臣交章薦
之藩臬率署上考至上被天子獎譽在郎時以平賊功
洎迎駕勞勩兩拜大紅表裏之賜其改保寧也特旨若
曰知府許詞殫勤任事加於諸臣之上其調繁劇以盡
厥才搢紳傳以為榮保寧任未幾即超拜令官蓋駸駸
向用而惜也公死矣初公居常思當世大務言漕事當
預擬常變欲江舟達淮淮達汴至開封府陸運至衛輝

入河若河澁則悉從陸別設官招募不過百八十里可
達京師庶緩急得濟疏擬上未果人皆以未盡公才為
惜曾祖祖皆累贈如今太宰官階襄毅公諱進前母張
氏母高氏俱累贈一品太夫人兄曰詔舉鄉試早卒康
敏公諱誥今太宰名讚曰記辭蔭不仕以齒德重於鄉
曰詩舉人任前府都事弟曰誌今廣西全州判官曰論
今南京大理寺丞公娶都憲白水侯公女有賢德子位
邑庠廩膳生娶杜君女女三一適垣曲趙應豐一適洛

陽李桂東一聘中都劉皆庠生孫男茂樾尚幼公生於
弘治辛亥三月十三日卒於嘉靖辛丑九月二十三日
得壽五十有一塋邑之九里崗襄毅公墓次毅齋子承
恩曰予嘗觀閥閱之家世濟厥美徵之唐宋如許氏者
殆亦有數夫本厚則末盛源深則流長又古詩云地靈
人傑許氏積德既遠而洛陽萃天地中和之氣名山大
川蜿蜒盤礴鍾靈毓瑞許氏實當其盛是故代生偉人
其父子兄弟既以名德勛業相望餘亦皆揚翹競秀崢

嶠卓立蟬聯仕途奕煜有光語曰徂徠之林不產凡木
崑崙之土不產燕石言其種則然也則柳溪公之賢豈
偶然哉豈偶然哉系之詩曰

許公閭閻洵美而文生於德門有賢父兄相觀相師考
德論學靡肆靡拘日見卓犖官政服勤夙夜弗替督府
持廉名邦撫字流殍無歸公煦嫗之濫獄不辜公雪洗
之脩復學政育爾俊髦省厥徵科民用不擾事有遵行
當務竟究汝避其嫌孰執其咎事有倉猝須人以承汝

避其難咎將孰勝惟公惟勤靡恤艱阻從容指揮咸中
厥度政立教行聲聞煒奕薦剡交馳皇恩下錫殫厥才
智有不足為宇宙內事悉吾心思邦計攸資漕事為鉅
常變機宜公有論著頃歲河徙棘於轉輸臣工束手當
宇疇咨方策具存莫或為舉通變達權公有攸處經世
志畧具見一端不究厥施有識所嘆爰樹貞石松楸之
下刻茲銘詩以詔來者

文簡集卷四十九

欽定四庫全書

集部

文簡集卷

五十五
五十二

詳校官中書_臣葉元符

中書_臣劉源溥覆勘

總校官原任中允_臣王燕緒

校對官修撰_臣戴衢亨

謄錄監生_臣張炳

欽定四庫全書

文簡集卷五十

墓誌銘

明 孫承恩 撰

朝列大夫湖廣布政司右叅議張公墓誌銘

少叅顧拙張公既卒且塋再明年其子鳴謙奉狀謁舍
告曰我先人之塋墓中之石尚未有文敢請余受而讀
之乃為叙次公之大致慨然嘆曰甚矣直道之不容于

世而公論之固在也人情莫不樂軟媚士多利於媿姻
取容而持正之士每至落落然是非之公有終不可廢
者君子亦求其是而已若公者所謂君子非耶公發身
進士尹嵎尹政和洎守茶陵守潞晉陟藩臬所至政績
炳炳聲聞綽著而忌惡者輒隨之用是屢起屢躋蓋其
徊翔仕途者餘二十年官僅四品竟不獲究其用而止
噫何其難也公之歷州邑也鄙故號難治公以廉幹自
勵罪胥吏之舞文者豪民之武斷者隸卒無敢以勾攝

入鄉汰冗食薄征輸民間喪葬無敢稽越聽獄明允旁
邑咸求決平其在嵎也併倉廨以便民而以其隙地為
義塚括丁田豪猾無敢詭匿政和有無徵稅額隱于巨
族小民代其償公覈實釐正之督勵諸生始有發科者
茶陵俗頑悍盜賊結族黨相隱匿吏無從捕公權宜立
連坐之法譏太駟之狡猾擅利者巨族侵負細民者懲
之隣邑有越境占田而避其稅土人患苦公咨上官責
所司無留逋歲侵當賑濟里書乘間私竊之小民嗷嗷

公廉得之置於法潞人多役藩府作奸弊土細為上人
誅求害特甚公至乃戢稅久法弛弊百出釐之使均毅
皇帝西巡權幸氣焰薰炙公以靜鎮境賴無擾其在湖
臬也憲度整肅囚徒多為仇家中傷瘐死重主者以罪
屬郡有盜辨出冤濫以百數馬役大為民間費徒便勢
家服乘盡革之荆廠越額抽稅商人怨咨移文責以非
制藩職總糧儲剋滌積弊禁吏陪尅屬有灾即議賑之
不俟報武夫多貪墨玩法歲徵每逋欠至巨萬立法員

者准其俸給公前後盡心於政如此而其在鄱也以誣
去在嶧也以忤上官去在湖也亦以當道不悅自是歸
矣直道之合可不謂難乎然公之盛美往往為賢者頌
記鄱有名宦志嶧有嘉政記政和有興學記茶陵有循
良傳潞有生祠記應薦剡者二在湖湘譽望尤偉既歸
猶有欲持疏起之者然則是非之在人孰得而泯滅也
夫迹公之所以忤世皆以疾惡守正勇於為義以公之
才向使少自貶損當行無不得必不若是齟齬而公終

始一節以之事上以之臨下以之持已當為即為不少
顧忌其忠鯁誠朴篤於自信如此嗚呼此其所以為賢
歟公諱萱字德輝順拙其號世為松著姓五世祖生玉
蟾玉蟾生隱德隱德生志恒志恒生述述生熙是為公
考富而好禮號長者母潘氏有淑行公生于天順己卯
六月十六日卒于嘉靖丁亥三月十六日得壽六十有
九葬于曹烏涇之原先娶陸氏大姓東臯翁女以賢稱
前公十八年卒繼孔氏實先聖五十八代孫壺範端肅

後公一年卒子二長即鳴謙領鄉薦次鳴殷女二長適
山拱宸次適朱朝寵皆陸氏出孫男六長仕郡庠生次
儒俸化儲孫男一幼孫女三初公之家食也與六七同
志為文會若先僉憲曹錦溪氏亦其一實狀公行故道
公為詳他如焚久逋之券篤友愛於其弟而推以恤族
御家衆嚴而有恩不登倖門不入城府其言縷縷不能
盡錄也姑撫其畧以併著公之為人銘曰

古道既喪事習陋卑脂韋乾沒世與說隨有方或剗剛

亦或屈得失切中何已之恤竭竭張公正直是殉強志
弗渝靡異以進見義而奮我職固然彼隘者嫉則謂我
專斃斃小民以溉以植有瘠者弊以疏以滌法豈我私
惡豈吾仇有赫惟明天子所授叶或挽而升或擠以墮
愛憎惟人要不失我我惟克全浩然為徒誰悔誰懟則
匪為夫墓石有銘細瑣莫述惟是之列以媿邪慝

廷評姜君墓誌銘

君以正德癸酉八月六日卒于京師貧不能歸諸所與

厚者咸致賻始克歸歸且再易寒暑貧不能塋適君同年唐君應韶行部至松諭有司賻其家始克營塋嗚呼於此亦可得君之為人矣君姓姜氏諱岐字希文號桂樓先世汴人遠祖伯寧仕宋階武畧將軍十世祖文輔元時為溧陽州經歷改松江府知事遂占籍華亭縣始居北郭五傳至信一則君之高祖也曾祖霖祖從父才俱隱德弗仕賑恤窮乏人稱長者君早慧屬對出人意表同里僉憲王吉齋先生試而竒之曰此姜氏千里駒

也稍長能刻意問學不樂嬉遊入郡覺愈自砥礪盡友
一時知名士弘治戊午膺鄉薦洎遊太學益得交天下
豪雋所造益深隨丁母憂歸以經業授徒多所造就正
德戊辰登進士明年拜大理評事無何以外艱歸服闋
詣都下需選命未下而卒嗚呼遭際如君亦已畸矣君
天性坦夷質任自然不立機械簡默重厚絕去華藻視
夸毗狡獪者真欲唾之地也濶達有度遇事無緩急每
過從朋舊輒盡日忘歸雅喜奕遇對局即弗肯休或事

事中以他事輟輒併其事忘之其散適如此至是非義利之間則鑿鑿有見在大理職平允諸獄或有疑卒難決者言人人殊議論蜂起君徐出一言斷可否或事涉利害衆縮朒莫敢主君獨當之雖聲勢恐喝不為動讀書務極旨趣喜閱史記綱目諸書故多知歷代事變洎入官猶不廢學姜既世寒薄君兩以憂居復屢值荒歉家計索然君不以介意日惟抱膝長哦蔬食菜羹恬然也君嘗乘舟遠出晚擬泊橋下若有神告以不可者乃

移泊他處是晚橋崩橋下舟俱碎人有折骨裂首者又嘗渡江值風濤甚盛他舟多覆沒君舟無恙此皆君末年事識者謂君當享遐福而竟止此非所意也君生於天順甲申九月二十一日距卒時僅五十歲先配柳氏前君十五年卒繼配陳氏皆有賢行子二長天民早卒次天爵女二張辟楊德元其婿也天爵卜乙亥十二月八日塋君祖塋合柳孺人之窀持所自為狀過余請銘憶昔丁卯歲予會試北上遇君于途時相過笑談出杯

酒酌蓬窓下歡不忍別予或以疑義質君君亦便傾倒
予甚樂其簡易也浮沉南北離合不常而茲又執筆為
君身後之役頰仰今昔能無死生契濶之感乎乃為叙
次其平生而系以銘曰

猿迎狙詐吁可愕我懷伊人志真慙破觚斲雕返淳朴
世方媿媿見諤諤我豈求異要無忤樹藝孔艱斂則薄
五十其筭歸冥漠

巡尉龍川顧翁墓誌銘

龍川翁既卒之三月其冢子斌塋翁彭溪之原之祖塋
合其配周氏之窀先持鄉進士楊君璉所為狀屬某誌
且銘惟顧氏世為松江華亭人曾祖景暘祖彥迪以通
經著名膺薦入英國公幕下父仁號柳塘翁諱瑤字廷
儀龍川其號也幼穎敏嘗業舉子中以故輟辟府掾慎
勤且才公暇脩然閉門鳴琴讀書若不事事績滿北上
從事儀曹慎勤如府掾時未幾以例輸粟冠帶歸成化
甲辰就選得南京草廠大使奉公守法出納明慎曰吾

盡吾職焉耳越五年改江西皂口巡尉奉公守法如為
大使時巡警不怠曰吾盡吾職焉耳未幾謝事歸翁少
有志既低屈不得售垂老猶自歎弘治甲子斌領鄉薦
翁喜曰是不足少償吾志耶吾即死可瞑目矣退即龍
浦之上築室葺圃移梅植竹日徜徉其中盡遺棄世俗
事郡守翁侯聞其賢禮致鄉飲衰衣博帶儀度雍肅觀
者偉之搢紳多樂與遊每遇翁誕日各賦詩賀翁剗羊
豕置酒召客吹簫擊鼓為樂逾數年乃卒壽七十八子

二長即斌湘鄉尹次文女一適李懌孫男三長中行先
翁卒次中立縣弟子員次中孚亦習舉業曾孫正傳生
景泰某年月日卒於正德十年月日塋以是年月日嗚
呼天之限人也久矣然能限其身而不能限人之為善
自世以儒為重每一切善必歸之儒曰非儒不能至凡不
善則曰儒必不爾也而彼之自列於非儒者亦甘心忍
耻而不敢與儒爭若恐攘其所有此則天不惟限其身
而併限其為善矣夫盡吾生事悉限於天其所得由我

而天無與者惟為善耳而又不自力使天得以併限之
豈不哀哉翁昔為從事洎歷官慎勤廉潔則既有以自
異夫人而其在儀曹也方以才敏得上人心徐當有遇
而翁亟以親故尅損服食求歸色養其在江右也一旦
引鏡照白髮曰吾且老吾母能幾時何以升斗祿為飄
然拂衣去執親喪戚文兼至奉其兄司訓公甚篤居貧
自守不事干謁教子必以忠義嗚呼廉勤孝友忠義儒
者事而易嘗為儒所專耶若翁者獨不能有儒所有耶

翁即所謂儒耶非耶儒或不能有其有而翁有之其將
賢於儒耶彼其居尊官享高爵偃然尸位而翁必曰盡
職位高祿厚者猶嗜進而翁獨勇於歸茲不誠賢於儒
耶若翁者天亦得而限之耶其可以夫人少之耶某忝
以文字備史職欲求夫人之賢者表章以為夫人勸而
不可得也斌雖無求亦將有述而况斌實請乎既誌且
銘之曰

超流俗之菟瑣兮拔儒者之高風
紉蕙蒹之韞穉兮佩

珞瑤之璫琬何於身之薄發兮羌貽後之必豐悵龍浦
之悠悠兮攬吾涕而無從訊曰幽復幽兮閱千古竊惜
惜兮寧此土

故麻哈州知州進階朝列大夫約菴陳先生墓

誌銘

有忠信脩潔之士曰約菴陳先生者行不絕俗而必由
乎道言不矯世而必稽乎理於利也推而遠之若將浼
也於善也勉而植之若弗及也盡心以畢分推命以致

義惕乎其無苟焉闇然無慕乎其外焉庶其為忠信脩
潔之士而惜也弗究於用遂以蹇躓而晦終也先生諱
瀚字深源別號約菴世為松之華亭人曾祖顯宗祖銘
父愉號節軒皆以善行稱於鄉妣周氏先生生有異質
端重貞靜數歲讀書即曉大義從鄉先生諸元吉習舉
子業諸及門士甚衆先生獨見穎拔廿八歲領庚子應
天鄉薦會試中乙榜授陝州儒學學正九年除荊州府
倅丁外艱歸服闋除濟南府倅九年擢景州守居無何

謫晉州學正久之再擢貴州麻哈州知州未上官乞休
致陝故乏科目先生至則振作之嚴立條教日坐堂上
與諸生講解疑義考訂課業於是文教興行前後發科
者五人荆民不善耕藝歲入尠薄民用是告歉先生捐
俸募松人往教之濟南號劇治常稅歲逋負先生搜索
其弊源禁治之不數月盡輸嘗四典文衡其在雲南也
藩司有好賢者欲假事處五十金餽先生辭不受倅濟
南承臺檄監德州稅洎竣事視常額餘千金悉輸之庫

秋毫無私焉既歸老前大中丞衡山張公璿時督學來
松於先生雅善恤其淡薄欲有以厚先生者先生漫然
弗以屑意張欽嘆之景州密邇畿內武宗朝中貴橫行
就先生索金甚急左右咸勸先生宜為自全者先生弗
之顧竟無與坐謫既復麻哈州守僉猶以地遠為先生
惜當道亦悔遣人語曰子姑往行且用子矣先生竟以
老疾辭孝友篤志早喪母哀慕終其身事節軒翁不違
其志諸弟死者育其遺孤貧者分已業贍之處鄉黨和

而有介誠以接物雖五尺之童弗忍欺也蓋其必為善而必不為不善必欲為君子而必不為小人斷斷乎無偽此其天資之近道如此然嘗聞先生每語人以讀書當篤信聖賢之言為必可行則其為學要不專於口耳而以實踐為事者故其於是非取舍之際知所決擇而外誘莫能奪之雖其得於天資有固然者而篤信好學之功亦足徵矣先生生於景泰四年二月七日卒嘉靖九年九月廿一日享年七十有八元配宋氏繼娶張氏

先十五年卒側室張氏子一大夏側出娶姚氏女二長
適安吉州判劉績次適前憲副定菴曹先生長孫仕俱
宋氏出大夏以先生卒之歲十二月廿八日塋先生於
監羅涇祖塋之側從其季父澤奉先生門人司訓李君
霆狀授予俾為之銘銘曰

黃桴土鼓施用則乖朱絃疏越俚耳不諧志靡徇時學
以致慙庶幾此生順事無忤嗤彼小夫佻儇自賢我懷
先生莫起九原

陝西叅議東濱戴公墓誌銘

戴氏之先汴人從宋南渡居臨安國朝初再徙松之上
海故其著姓最遠元時有諱善卿者為海運萬戶善卿
生德三仕元至提舉德三生彥文彥文生聲伯聲伯生
暄暄生春以進士為考功正郎陞順慶府知府有聲天
順成化間春生偉則公考也公諱恩字子充東濱其別
號少穎悟儀狀端雅與弟慈在黌校俱有俊稱舉正德
辛未進士授北京工部都水司主事監漕江抽分事竣

還收支營建乾清宮物料未幾轉員外郎督運營建大
木戊寅進秩郎中階奉議大夫奉勅專理儀真至臨清
河道庚辰擢陝西叅議未上官以疾懇乞致政歸公為
人外若散懶而內實機警明悟其監抽分也值歲課不
登人謂盡為之處公曰吾寧以是獲戾不能効培尅吏
也御史王堯封特為奏免之其職營建也出納物料總
理慎勤有白金文綺之賜感激賦詩淬勵先是運木以
民夫所在勞擾不能堪公疏請用近京軍番替人頌其

德其職理河道也興舉廢墜剗滌蠹弊重開寶應裏河
增脩谷亭上下埧閘驛傳多空匱復苦權勢橫索無紀
轉益不支每公使至顧輒稽留不得發公悉為之處漸
見規制毅皇帝之南巡也郡縣吏往往棄印逃譴公獨
與總理河道御史龔公弘經畫供億送迎百務斬斬坐
毀勞構疾因有歸志比得請時方五十有三乞身於未
衰可謂達於功名之際矣夫仕者多狃於不知止卒以
困敗此君子之所慎而常情之所忽也公於出處如此

豈非賢哉公在少時即負志不羣思繼述先德既以科第踵美尊榮其親贈殿考官郎中母江氏贈宜人及謝政歸益振拓先業檢緝遺文所以光前裕後者弘且遠矣天性直率履真任情脫畧儀節晚得重聽疾與人益不能款曲人頗以簡伉病公然實無他也公生成化庚寅十一月二十二日卒嘉靖戊子十月十四日壽五十有九配侯氏先僉憲方之女賢而能文側室錢氏盧氏子四長邦榮聘工部員外郎郁山女次邦傑聘予女為

弟恕後次邦梁聘府庠生杜世顯女俱錢出次邦梁聘
承事郎宋公才女盧出女二長適先憲副楊玉峯子府
庠生秉道次適工部主事張南汀子平湖縣庠生選俱
侯宜人出公卒之明年是為嘉靖己丑邦榮等將以十
一月廿八日塋公于河涇之西具鄉進士戴君正卿狀
謁予告曰先人早棄諸孤福不酬德善不彰衆所以悼
嘆揚權之者惟夫子是賜予昔與公同舉禮部又有葭
莩之雅憮然諾之未幾予且病懼然不能執筆邦榮復

來速曰塋且及矣乃即狀中語少為刪潤而於揚榷悼嘆之意稀矣姑存其大節焉耳銘曰

有昭其內靡飾乎外弗介乎細克立其大振厥前猷孝思維嘉服勤官箴亦莫我疵瑕進也維裕退也孔亟薄於取名以保始卒吾履吾真吾無比周人莫吾知而謂我仇詵詵者嗣頴發莒秀餘休所鍾尚卜其後

定遼左衛經歷李君古愚墓誌銘

遼東定遼左衛經歷李君古愚之塋也其諸子自述其

世系官職行能生卒墓地為狀而謁予乞銘嗚呼古愚
不可作矣予忍銘之哉予昔弱冠從吾先伯兄守齋獲
與古愚友倏忽四十年矣故人也古愚天資篤厚寡過
失與人懇惻言必據道誼自予侍接未嘗見一語及不
善若規正闕失則有之益友也今不可作矣予忍不銘
哉乃即其狀悉序次之而為之銘不少增損者惟其實
也銘曰

繫李之先世系綿邈在勝國時勛閥顯焯木氏華黎四

世五王保大佐運莫能與京

叶江

四世祖者官松鎮撫

生子處仁業文棄武弱冠發解于時有聞逮于皇朝易氏以今歷官縣尹始居雲間是曾大父有濬其源諱萱者祖諱寅者父皆舉于鄉寅職學諭實生二子伯諱希顏為時名人長憲滇南君諱希曾實維其季古愚者號原魯其字幼性警慧於學孜孜厥考攸愛侍側靡違考典文衡君克左右簡拔名士藻鑑弗謬洎入黌校綽有時譽屢試弗第命也則拘中歲奉例卒業曹監友天下

士以大聞見扼蹇履屯卒艱於成達人委順於天曷爭
俛焉就官以畢予事一命亦榮亦足行義爰職衛幕實
惟邊陲戎務孔殷贊畫是俾武人顓顓乃罔攸職謂予
儒生僅事咕嗶事慮展布從容其間事罔不協上下改
觀肅肅憲府疇咨器使謂予汝才予俾汝事勸功論賞
惟公惟明憲府予嘉衆論以傾乃整鹽法乃料戎器盡
心酬知敢曰予瘁秉正招尤肆為詆誣公道惟明疇予
蟻污晚而倦勤奉身以退我丘我園聊以卒歲卹我故

知罄橐中金壺觴宴會洽欵族人藝我菊松務我稼穡
城郭公府無我足跡郡舉鄉飲議欲予招我樂靜居勿
為我撓督策子姓勵汝學業我老無能汝紹前烈嘉靖
癸巳君疾在床十月十六溘焉淪亡君生甲申孟秋四
日計其甲子得壽七十惟君淳篤秉恭執謙與物無忤
性成則然雖則無忤中亦有主靡或詭隨以道義與世
衰俗降士習以澆我求若人慨其寥寥君配湯氏宦族
之女賢能相君婦職脩舉教子幹家亶其勤劬弗克偕

老中道而殂先君廿年維歲乙亥壽五十三誌也有待
君四男子新昌繼昌永昌克昌塤簫和鳴叶芒復有五
孫人臣人英性統及瑞是惟其名叔子伯孫皆在庠序
質美嗜學克纘其緒亦有五女悉婚高閭曰翁孟氏二
媚業儒乙未仲冬卜日惟利爰茲窆君與湯合窆洞涇
之陽厥土燥剛刻銘誌之千秋永藏

興寧縣知縣封承德郎南京刑部主事靜虛顧
墓誌銘

嘉靖己丑二月三日靜虛顧公卒其子中立中孚將以十一月廿八日塋公梅涇之原奉文學何君汝元狀授予乞銘嗚呼靜虛不作矣予昔與公同薦於鄉雅辱知愛比方慶公有賢子享眉壽而忽已弔公之死乃執筆為公身後役也公諱斌字德章靜虛其別號世家華亭高祖景暘曾祖彥迪以通經入選未仕卒祖仁號柳塘考瑤號龍川任江西皂口巡檢母周氏以賢淑稱公自幼有至性甫六歲龍川翁以從事滿將携家屬北上時

柳塘翁病目公憫然曰大父盲行須我扶我去使終日
坐卧耶獨願留侍俗尚鬼家像事之公讀至非其鬼而
祭之誦即憤然舉像投之火比長勵志學業讀書務窮
本源不事剽竊貫研古今尤究心象數之學聲稱藉甚
以弘治甲子取雋四上春官弗利人咸惜之授湖廣長
沙湘鄉縣尹未赴丁龍川翁憂歸服闋改知湖廣郴州
之興寧邑先有淫賊之變凡七罹兵火民凋瘵殊甚公
殫心撫字崇素儉裁冗費專以休息愛養為本邑當孔

道未嘗以一馬假過客雖權要亦不少徇先時邑額編戶二千餘至是亡徙過半而徭役踵昔民滋不堪公歎曰是驅之使淪胥也擬上請併里為有謀者曰減戶法當降奈何公曰以已故而忍視民困吾何心哉卒疏請得俞旨歲壬午河南大旱興寧田頗登上官有欲征租之半者公抗詞曰旱被數郡興寧獨遺耶雖間有獲然勞敝亦甚矣征之是教之使惰而又重困之也力爭得免民賴以活每公暇進諸生講肄親為指授振作文教

邑素乏科目至是稍有獲第者公之政事可紀者如此而當道乃有不悅公者論公劣於才公聞之曰吾無媿於心耳遑恤其他飄然拂衣去銓曹諗其良特奏留之命下而公行矣公為人誠慤無偽樸雅好古言動不戾於禮居喪哀毀杜門簡出嘉靖丙戌中立中孚同舉進士公遺書曰此發軔初也必慎所趨一失足倖門終弗克振拔矣其謹操類此戊子歲天子推恩羣臣皆得以尊榮其所生公得封如子中立官階承德郎南京刑部

主事公生於天順庚辰十二月十八日距卒得壽七十
配康氏封安人子男三長中行先公卒次中立任令官
次中孚江西袁州府萬載縣知縣孫男五正傳正名正
宗正言正誼孫女四長適宋玄相次許曹復來餘尚幼
曾孫男一尚賢嗚呼公昔在黌校負盛名謂當暴耀顯
重於世而偃蹇薄發夫學也者所以探本也行也者所
以違俗也政也者所以宜民也三者士之所貴公實有
之是宜暴耀顯重於世而公則不然然公不獲而子獲

之騰英振華連璧競秀諸孫玉立將益亢其宗斬於其身而發於其嗣天之所以厚公者固於是乎在銘曰
耨之藝之薄而刈之航之柁之若或繫之殷敦周彝世
莫利之嗣其昌矣天者償矣刻辭揚休安其藏矣

文簡集卷五十

欽定四庫全書

文簡集卷五十一

明 孫承恩 撰

墓誌銘

刑部郎中北野周先生同配吳張二宜人合塋

墓誌銘

北野先生既卒之三年宮宋氏孫承恩始克序次其世
系行實將銘而納之墓中而先為之論曰嗚呼世道之

下久矣士以趨時合變為才智利之所在陰伺巧取凌
躡馳騖矜榮侈耀違道義而不顧也先生仕幾二十年
而僅得五品秩寂寥淡薄至無以裕其家此今之君子
所謂迂且拙者也雖然利達恒一時而聲名垂身後彼
務榮侈耀之徒隨以湮沒者何限而先生之清德雅操
傳誦人口則其所得孰多使先生而豐乎彼則必歎乎
此矣然則先生非今之士乃古之士也嗚呼是可以銘
先生矣先生周氏諱佩字鳴玉別號北野先生世由汴扈

宋南渡遂為松人其遠祖在宋元時多仕宦五代祖彥
才有隱德博學能詩著灌畦集藏於家曾祖士瞻號雪
舫亦以詩名國初辟為雍縣尹祖臨考輿號心齋正統
丁卯南省發解登進士為翰林院編脩其履歷載郡志
妣朱氏封太宜人先生年十二隨編脩公於都下編脩
公卒晝夜號泣不輟洎歸貧無以居時江右葉中丞為
郡守為經理始克塋先生天性穎悟力貧好學入郡黌
聲譽焯起一時多從遊之士成化癸卯登鄉薦弘治庚

成舉進士優等授工部都水司主事三載考最陞營繕司員外郎都水職征商稅營繕督工作出納財賦浩大異時多以貪墨敗先生不以毫髮自污弘治庚申以母老乞歸侍養六年母卒服闋轉刑部河南司郎中理獄明慎時逆瑾擅政權勢赫奕奔趨於其門者多驟致通顯先生獨不往瑾故不平每問人曰刑部周秀才吾不識之何如人也先生懼及禍亟上疏乞休致歸養高林泉以詩書自娛今天子初即位舉優老之典先生進階

朝列大夫嘉靖戊子再進階中憲大夫福履優游歷二十五年乃卒先生天性孝友其官於朝嘗疏請分祿以養母而邸中屢至匱缺其在侍也色養誠篤致甘露芝草之瑞養姊若妹之寡而貧者竭力以賑恤族人生平寡嗜好居室之內一榻蕭然倦於將迎有司延鄉飲多辭疾不赴獨好學雖老弗倦晚益喜讀易觀象玩占多所妙契作文典雅詩學唐體字倣晉帖皆有法先生嘗編次先世遺稿為世鳴集今太學生張應乾取先生詩

文若干篇附刻行世周氏世以清白傳先生仕既不大
顯家居生理尠薄至無以自給既蒙例兩進階而郡邑
庠士復合辭以請于當道謂先生廉貧高尚宜蒙恤典
于是有司歲給優養前郡守善化熊侯雅致敬慕嘗袖
白金十兩遺之先生卒其斂具實藉焉先生生于正統
丁卯十一月二十九日卒于嘉靖壬辰二月二十六日
享年八十有六先娶贈宜人吳氏早歲事先生躬紡績
以資勤苦先六十二年卒為成化癸巳九月十一日享

年二十有七繼娶張氏封宜人善事其姑稱為賢婦先生三年卒為嘉靖己丑十月二十日享年七十有三子男三長呬吳出庠生早卒娶宋氏次簪前補庠生娶朱氏次第娶胡氏皆張出女一亦吳出適推官侯靖之子祿孫男八應恩應文應時應宣應期應登應通應豐曾孫男三重光重慶重顯初先生之疾革也亟語朱原伯氏以誌銘屬予予時官都下洎歸原伯偕先生二子奉治命持狀來請原伯於先生有姻婭之好狀其所具

也於是將以嘉靖十三年十二月初十日塋先生於余山之祖塋合吳張二宜人窆銘曰

彼捷而趨吾守吾迂彼赫而熿吾抱吾拙松竹蕭疎晴雲卷舒優游林泉古人為徒鮮鮮者葩亦復消隕先生清名世世不泯

固始縣知縣芋城吳君墓誌銘

宮宋氏毅齋孫子曰吾讀庠友楊朝明所狀芋城吳子行實而論次其有八善焉芋城者諱周字子南號芋城

早孤奉母盡色養母老喪明承侍勤恪久弗懈泊仕未
逾年一日念母即白上官歸上官留之不得母卒哀毀
越禮君子謂能孝矣有異母弟甚幼保愛之至藉以成
立處宗人有恩婚喪者賙其匱乏子弟質美者教之君
子謂能友矣能睦族矣里有計姓者孝母而貧無以養
數餽之粟肉沈甲為仇家誣以盜不能白為直之燕人
劉乙雅相善以事抵松得疾舁來家躬調治之洎卒棺
衾之誌其橐以俟其子至官中王學諭篤疾託以幼子

曰有弟雅仇某歸恐兒無全王卒留弗遣擇地葬之買屋居其孥擇諸生有學行者教之以須其成君子謂有風義矣令羅源固始二邑羅源民情不力耕田多廢嚴督率之民有餘食在固始則勸課農桑又濬河灌田萬頃篤意學校勸勵諸士羅源始有發科者君子謂知政矣羅源地瀕海故事海舶至必責其入謂過舶錢吏習為利亭城盡革之慎守無苟取官中費至取給于家業為之落君子謂清白矣中貴人遣索羊豕若干頭甚急

執不與王通判任子殺人吏不敢問紿之至即坐中縛
之論以法御史李某弟怙勢暴於鄉必欲執之懼而逃
君子謂履正矣其歸也以上官有過責以非禮者義不
屈飄然解印綬無濡滯君子謂輕利祿矣毅齋子曰昔
者弘治甲子之歲予蓋與苧城同薦於鄉日益相厚信
其為淳朴坦夷溫然君子人也乃茲所謂八善者固嘗
得其二三焉而餘則令徵之于狀而信其不誣者嗟嗟
乎苧城有此八善其亦可謂賢也已矣苧城少在郡庠

有俊稱三十二始獲薦四試禮闈不第乃就選在羅源者一年固始二年洎歸方從事隱居之樂未久以病卒嗟嗟乎苧城其已矣福不配德君子傷之吳世居華亭之雲間里高祖衡仕陝西叅政有名曾祖宗徽祖愉考寬俱不仕妣黃氏苧城生成化壬辰四月八日卒嘉靖甲午七月二十二日壽六十有三娶張氏男三思友思讓習舉業思學尚幼皆側出女四二適宦族二在室思友等以卒之明年為乙未十二月十有六日塋苧城于

上橫涇之西原從其季父水部君平坡來乞予銘乃為
銘曰

維德之厚福則弗究弗大厥就復弗永厥壽曷信曷咎
天者匪謬吾將徵諸其後

鄉進士玉齋楊君墓誌銘

楊君李玉以嘉靖三年七月十七日卒明年其子秉公
將以三月十三日塋君於滄涇之新原顧未有銘其墓
石者則請於其伯父令考功正郎璞齋璞齋曰汝父雅

於今太史孫子毅齋厚銘莫毅齋宜則具狀與幣來謁
嗚呼余忍銘君哉念與君昆季父子交垂三十年不可
謂不知君君才賢而未仕茂所顯著非銘恐遂湮沒卒
無以表見則亦烏忍不銘君也君諱璉季玉其字別號
玉齋少穎敏有志楊氏業素優裕繼嘗中落時君伯兄
憲副玉峯暨仲兄璞齋俱以就黌校厥考南隱公頗憚
供億每顧君嗟不能併相君成學業君自奮曰悲哉為
學而以貧廢苟不自樹立而以貽父母憂不名為人乃

東書從二兄就外舍攻苦食淡誦習勤晝夜南隱公卒
君甫娶時憲副已舉進士念君尚少諸凡不以及君君
不可曰吾獨非子耶盡出嬾簪珥屬為助性孝友每恨
南隱公弗逮養事母篤至叔兄早得末疾君與偕處扶
掖終始不懈育從兄遺孤女既長與擇所歸與人交棘
棘不阿有過盡言規誨而未嘗竊議人長短儀範脩整
雖閒居無惰容讀書務求旨趣為文多警拔自為郡弟
子員即以時文擅名朋輩正德庚午薦于鄉三上春官

弗售中歲漸欲取自適意葺園圃購奇石疊為崖岬雜
植竹木有亭榭之勝方日與朋輩登陟笑歌為樂未幾
以疾卒楊氏先居上洋後占華亭籍自高曾祖皆世業
儒不仕南隱諱雲嘗事進取中以故輟後以子貴贈營
繕主事妣宋氏封太安人配孺人朱氏勤慎克執婦道
相君治南隱喪暨事姑無違禮待群妾有恩視所出如
已子先君一年卒子三長即秉公孺人出次秉和側室沈
氏出次秉介周氏出女一適宮保張莊懿公之從孫棠

棠卒而寡君生於成化十二年六月十八日距卒得壽四十有九惟君器業夙成與憲副考功將蜚英騰茂而其名與字俱從玉人目為楊氏三玉伯仲既各顯仕登用於時輝聯采映而君僅獲一鄉薦賁志以沒嗚呼其可悼惜也矣銘曰

有琰者瑯繄同出也為瑛瑤瑜靡差別也既琢既磨並美絕也彼登廟廊布芳烈也此胡不然乃缺折也數則靡均匪巧拙也銘以瘞之鎮茲穴也

東圃陸翁墓誌銘

翁善人也余讀其子希哲甫所狀翁行而得其善足稱者四憮然嘆曰今里閭中求斯人若者亦或尠矣淳朴散而民偽滋凡可以售詐以罔利者靡不至翁少年事貿易其權衡出入惟一雖三尺之童弗忍欺視他壠斷巧取者獨不逮世多掊克寡施與每以力莫及人為解即有之然出毫末於千百勢宜無難翁嘗節口體以濟糲獨鄉人逋負悉其無所償取券焚之無恨意正德已

已歲侵且疫，饑人死者枕藉。原野翁作粥食乞者，復與以直，為掘大坎，瘞之。富民於公家役使多詭計，自脫。翁先以勤儉幹蠱，頗自裕。其業中為里胥所禍，充富民輸布赴都下，是役往往破家。非貲多甚者，與狡猾多計算者，不克免。翁實不稱也。隱忍不自直，比至復，值貂璫用事，需索百出其費，更倍。往時歸，則求直有司，責姻族助償。逋負或反，寅緣為奸，籍一稱十，籍十稱百。翁獨隱忍，不敢自直，曰：「吾命也，何可累人？」吾惟責償于天耳。業乃

用大落翁亦安之方日以教子為事浮薄子欣籍聲勢
門戶幸獲稍異即變易常度漸事夸侈哲既顯榮翁
執謙守朴與昔無異人勸其稍自矜飭則笑曰吾固故
吾耳不能也周旋里閭姻戚者益自勤款嗚呼之四者
庶幾古老淳朴之行然亦非甚高絕異余既悲今里閭
中之斲斯人而又深嗟世道之日降也翁年既高有司
以鄉飲賓禮之今天子初即位舉優老之典翁得受散
官兼絮帛米肉人謂翁行善所致云翁陸氏諱澤字民

望別號東圃松之華亭人先世遠莫考祖達以行誼總
區總父拳敦本力穡翁配朱氏勤織紉助翁缺先十五
年卒子三長景先即希哲登鄉薦歷臨江慶遠節推次
景賢次景芳孫男七人曰曜曰珊曰瑚曰瑠曰玘曰翔
鳳曰儀鳳孫女二長適嘉定士人姚陞次適張莊簡公
之曾孫國子生立愛翁生於正統九年正月十七日卒
於今嘉靖四年正月初六日得壽八十有二塋以是歲
十一月十二日墳在洞涇左新浜之原銘曰

以義取利利斯溥以力行善善斯確以命委天天斯酢
以謙受福福斯渥吁嗟陸翁古淳朴歸全其真靡利鑿
銘幽者誰太史作

封承德郎刑部主事慎齋沈君墓誌銘

鳳峰沈子愷喪厥考慎齋君前沈子官都下屢念君欲
歸君輒以書諭止勉其盡職業務大孝會今天子覃恩
羣臣君得受封如子官刑部主事於是沈子從諸交厚
徵言將為君壽未果得君訃沈子擗踊號絕匍匐以歸

拊柩擗踊號絕若不欲生既乃具世系行實授其友宮
宋氏孫子承恩為文納墓中誌曰君諱熙字應和別號
慎齋世為華亭人曾祖脩閑翁諱閒祖月山翁諱敬父
東樓翁諱浩皆有隱德東樓翁恩授徵仕郎行誼尤表
著見鄉先正曹憲副定翁傳母劉氏君自幼穎敏長多
幹局遇事無留難性孝友東樓翁有子四君其季也東
樓翁獨善君謂善事已親喪哀毀切至後遇歲時奠享
輒慘感終日受沈子封命也愍然曰吾父雅愛吾而乃

不見有今日嗚咽不能休諸兄既先後淪逝撫恤遺孤雖貧不忍割竈自食業乃大窘君處之怡然無少弗足意惟終日閉門教子乃諸子各用奮志沈子遂以甲科成名君少嘗讀書不竟然所習志久弗忘每因事輒能引據沈子官刑部嘗被命錄囚畿甸君報沈子曰刑獄繫民命王賀于定國當深長思也用是沈子錄囚多平反君乃用大慰君尤喜鑑別人去後當成敗少館於外家陳氏內兄弟率楚楚然獨愛重陳子汝器者曰是不

凡人問其故曰裴行儉觀人先器識吾以是據耳茲陳
子舉進士為京官矣君質任無他蹊徑與人語易見肝
膈既乃以慎名齋若欲事自檢雅能飲深觴細酌雖終
日不及亂當座客囂呼弄酒君獨靜嘿整飭冠襟儼如
也生平不畜媵妾無聲色之樂沈子日即華要門戶奕
奕異往時君愈自抑下約束子姓戒戢童僕無敢縱恣
其所以為慎者如此雅好交士人往時嘗客遊尋訪幽
勝必邀士人與俱宮家氏孫子昔居憂君數問候携壺

觴來歎洽終日戀戀至日暮弗去其情致可念也君可謂善人而惜也死矣沈子語孫子曰孤為仕宦去親側乃不能躬致滫瀡又無以為先人榮所以為不朽者惟子是賴嗚呼沈子方以才賢克自振勵駸駸乎光大所以為君顯揚者有餘地矣而于淺薄之文何以哉君生於成化乙未三月二十九日卒於嘉靖乙未四月六日享年六十有一配陳氏以沈子封安人子四長即沈子愷已丑進士今為刑部正郎次悌次懷次忱習舉業女三

婿倪霽蔣顯于道中孫男三子鯨子鱗子鼇孫女五婿
陸承芳府庠生次受顧氏聘次受朱氏聘餘尚幼沈子
將以嘉靖丁酉四月一日葬君闕之原先是沈子覓葬地
久弗得忽夜夢東樓翁指示質之堪輿家良是若先啟
云銘曰

長河橫前大陸枕後新塋在左祖塋在右地道則順靈
氣斯構其歸其安百世是守

若愚翁君并配顧孺人合塋墓誌銘

翁子德輝喪厥母顧孺人將塋前是厥考若愚君之卒之塋墓未有銘乃今奉厥祖樂閒翁命持庠友張子永思狀來謁銘于宮窠氏孫子狀述君曰君諱經字文綵號若愚樂閒翁震長子也母唐氏世居上海長人鄉樂閒翁之高祖文俊洎翁俱隱弗仕翁氏世困鰥司賦役艱重至君益衰君甫授室即奮志植立掘勤抱辛攻苦食淡竭力賈事以振作舊業用是樂閒翁夫婦蔗境優裕翁三十年不入城府蓋以有能子也君性友愛二弟

緯綸俱庠生胥藉資益諸凡君自當之不自計惜故二弟得盡力問學樂閒翁則用懌喜禮賢好士既有二子延師誨之而勤策之樂閒翁見諸生彬彬復大懌喜簡重寡言笑自束髮至白首未嘗侮人尤喜賑卹隣里有急濟之不責其償嘉靖壬午八月一日以疾卒卒時呼子囑曰死生命也復何言惟是親恩未報為恨是在汝等勉之語訖而絕距其生成化七年二月一日得壽五十有二塋顧望塘之原述孺人曰孺人者君同里顧暹

季女也柔婉貞靜年十七嬪于翁躬織紉為內助既則
盡解其簪珥畀若愚曰丈夫當赤手致萬金陶朱猗頓
非人耶何坐受困也君行矣若愚既得貲而又幹敏多
計算遂致克裕相若愚執友愛仲叔子玘與德輝同學
業撫字均一訓子以嚴每曰子之不肖皆母縱之也故
二子自少不聽嬉遊嬉遊則撻之若愚卒孺人益務幹
理喪姑哭泣殮塋竭心力德輝舉鄉薦第進士孺人每
念若愚不及見居常悵損不樂坐是邁疾遂至不起生

於成化七年三月十六日卒於嘉靖乙未十月廿四日
壽六十有六云君與孺人生惟二子長璨即德輝乙未
二甲進士觀禮部政其配俞氏次瑤充邑庠生其配陸
氏孫男八人禎祥禮禴禎衛庠生皆璨子也祺袞楊
瑤子也塋以今丙申冬閏十二月九日與若愚君合窆
孫子曰予觀若愚夫婦行義之次第而謂其可銘也君
既孝友仁厚無惡于鄉閭而孺人脩婦事實同幹勤以
裕其業篤教其子策名甲科昌大其門戶而增光於前

人是皆可謂善而可銘者予烏得弗銘也乃銘曰

夫行靡疵婦德亦良宜是善配聯輝並芳教子克成而弗及覩母則覩矣祿養亦負有待貤封龍文錦幅賁于泉扃墓門增高惟善斯獲天者弗繆刻詩幽宮以詔厥後

濟軒處士王翁同配陸孺人合塋墓誌銘

濟軒翁於嘉靖十七年正月二十一日卒既葬其冢孫廷評教奉其尊人醫學正科君山之命持狀丐予銘其

墓予諾未果為未幾正科君復遣教來告曰山罪逆深
重荐罹荼毒乃母陸孺人亦於今七月二十一日卒兼
以狀請願併誌而傳焉按狀翁者太學生張子世美狀
孺人者庠生沈子耀先皆於王氏有世講義其言審可
信乃撫而叙曰濟軒翁姓王氏諱宗字茂承濟軒其號
世為松人國朝永樂時有諱輔者以人材薦任廣西全
州判官為時清白吏則翁高祖也曾祖考昱祖考祥考
繼號耕樂配劉氏生三子長即翁次鳳次霽翁自少岐

疑有成人風為曾叔祖暘窩翁所愛暘窩翁諱暹配吳生子璿號東溪配李無子暘窩翁器翁每手旋其頂曰是必能亢宗者因立翁為東溪後東溪於是遣從學來菴彭先生之門翁復穎慧勤習讀通經史大義尤精楷書長益通練世務善事東溪翁夫婦東溪讀書好鼓琴興致古雅日與諸名勝士觴詠以樂翁侍側承歡靡違東溪沒殯在堂翁應役有司督運赴都下事未竣聞家遭回祿憂惶馳歸途次逢鄉人亟問柰無虞乎知無虞

即色喜他無問然業無遺餘時有契友持百金為贈者
翁嘆曰丈夫不能自策勵乃資藉人耶辭之搏節服食
竭力幹蠱不五六年盡復舊業且加拓焉翁質甚美善
處人倫之際先是弟鳳亦以東溪命來為後惟霽留侍
耕樂翁篤念無已養生送死不廢子道人謂其周旋為
難與配陸孺人相守至耄禮敬如賓兄弟友愛殊切鳳
晚歲無子疾革時亟請翁至曰我非兄無今日出遺囑
田產契券授翁子山曰此王氏物也他莫得有翁為悉

治後事豐厥殮塋人兩多其義霽居窘恒不給翁輒賙之復置田贍之山初業舉子以多病中輟既得孫教且長曰吾家自全州公來五世無仕宦矣其在此子乎不可失也篤教之教果成登甲科後官會稽令翁嘗手書三事為訓翁與人交重然諾御僮僕有恩儉約慎勤終始如一日卒之前一夕呼子山曰吾明逝矣次即寔我勿作佛事語畢而絕若能了達死生云翁居常訓子孫人只要心清便做事不錯君子聽其言謂翁平生自得

在此陸孺人者諱淑正上海鶴沙里人世業農厥考諱
寧者始讀書以毛詩授徒至數百人母張氏孺人及笄
歸濟軒翁克執婦道孝敬其舅姑處姻戚和而有禮方
濟軒之遭家變也每竊自悲守業無狀孺人慰藉曰數
也可若何人不有徒手以復起者吾與君當自力何悲
也乃日夜爬梳檢括以相翁翁先得子不育憂之孺人
曰聞為善必有後勉矣天獨吾靳耶既有子復見孫教
登第仕于朝仲孫政亦應列入太學業駸駸盛孺人喜

動顏色每謂翁曰吾與君有家且有後矣曩時意念寧必此何以答天貺也其賢識類是翁與孺人既偕躋上壽教令會稽時少宰中峯董公侍御見吾陳公咸有文祝翁夫婦壽正科君適際九廟成推封如子官夫婦具命服上堂稱觴為壽慶洽重闈閭里羨嘆以為榮云翁生天順庚辰十二月十四日卒年七十九孺人生天順乙卯三月十四日卒年八十子二長即山封文林郎大理寺右評事娶姜氏封孺人次岡早卒孫男二長即教

壬辰進士文林郎南京大理寺右評事娶姜氏封孺人
次政太學生娶顧氏孫女一適鄉貢進士徐旒子隣曾
孫男二之言之心女一墓在莊港之東原塋皆以治命
在卒後三日銘曰

弗究於學而理道克脩弗顯於才而業由以振古之遺
老今之善士有相厥配協德並美積厚者發鬱久必伸
謂天若誣請觀厥孫

太學生雪懷湯君墓誌銘

君諱惠字世沾別號雪懷故周姓湯從舅氏也先世汴人扈宋南渡遂家於松高祖某曾祖冕俱不仕祖端為郡從事父諮號怡蓮義授承事郎妣湯氏前大中丞拙默公之姊寡育為怡蓮翁禮娶趙氏為側室君其所出也君自幼穎敏秀整為中丞公所器愛長業舉子入黌校有俊稱中奉例輸粟入太學接友天下名士增益其所見聞未幾註選歸日侍養其二親光飾先業洎前後執親喪罔愆于儀君家食既久毅皇帝末年武弁錢寧

怙權寵勢傾內外君有姻婭以蔭官于朝者與寧叙世
好甚暱數以書招君曰無失功名之會吾為若謀富貴
可立致也君不報其交厚亦有愆憑君行者君笑曰子
不憶冰山非可恃者耶後寧敗伏辜其黨與無一得解
脫者嗚呼當權奸竊執大柄可以禍福予奪人茹連類
引奔趨於其門者如蟻之附羶也是雖賢科之士以才
傑自許者亦或俛首從之不知其不可而君獨卓有定
見亦可謂難也矣君偉儀觀長髯飄蕭每於賓筵能多

飲而不及亂雅歌投壺抵掌談笑歡洽滿座惟恐其去也開爽通達廣交博與樂親仁賢故賢士大夫無不愛重君者君既無汲汲進取志益與其朋輩為觴詠讌遊之樂若盡置榮辱於度外至是君亦且老矣元配徐孺人賢而無子置側室亦無子擇從兄子為後名從本娶婦趙氏女三長適太學生喬禾徐孺人出次適錢文通公孫啓寓次適庠生沈策子縈側室出嘉靖癸巳之冬君忽得末疾久弗痊勢日增劇遣子婿要予內弟吳德

章狀其行持來告曰愿得一言刻石納墓中此生庶不落莫矣忍死待君惠冀一讀以瞑目也予憮然傷之亟為序次其梗概不敢為溢美辭者示信也方緘至君所而君已瞑目矣於是其子婿復持文來乃附其生卒曰君生於成化戊子月日卒於甲午正月十九日得壽六十有七以月廿七日塋於龍樹庵華亭鄉之先塋銘曰湯君閭閻髯而長身行美鄉閭多標搢紳冒昧取榮我則弗有世俗之疑君子之守維古節惠義也匪迂我最

君善亦莫是逾刻之幽宮來者其考諸

文簡集卷五十一